



E-BILTEN

SAVEZA OPĆINA I GRADOVA FEDERACIJE
BOSNE I HERCEGOVINE

Petak, 18.02.2011. godine

Br. 106

Aktuelnosti:

1. NAJAVA održavanja 13. sjednice Predsjedništva Saveza
2. Projekat «Na granici carstva» u okviru IPA Programa
3. Održana Konferencija o jačanju lokalne samouprave u BiH
4. Neupitna saradnja Općine Bihać i UNDP-a
5. Predstavljen MGD-F Program očuvanja okoliša i klimatske promjene
6. Ambasador Njemačke u posjeti Goraždu
7. Uspostavljena saradnja Saveza sa ANCI-em
8. Općina N.Grad u 2010. pružila 520.784 usluge građanima
9. Uvođenje sistema energetske efikasnosti u Općini Gračanica
10. Zajedničkim snagama oživjeti turizam u dolini Vrbasa
11. Info sa sjednica komisija Saveza
12. Potpisan ugovor za realizaciju projekta otpadnih i oborinskih voda na području Općine Bihać
13. Konferencija o lokalnom ekonomskom razvoju u BiH
14. Općina Travnik stvara preduslove za razvoj turizma na Vlašiću
15. Potpisan ugovor o partnerstvu između Općine G.Vakuf-Uskoplje i REZ-a
16. Emisija obveznica Općine Tešanj putem SASE
17. Potpisivanje Sporazuma načelnika o energetskej efikasnosti
18. WB obećala pomoć Goraždu
19. B. Petrovac pomaže MZ «Janja» u općini Bijeljina
20. NAJAVA obilježavanja Dana općina

GLEDAJTE svake druge subote u 13:30 sati na Hayat TV – “Moje dvorište” dokumentarno informativnu emisiju o lokalnoj samoupravi.

Repriza je ponedjeljkom u 21:00 sati.



NAJAVA

MEĐUNARODNI SAJAM OPĆINA

Sarajevo, 10-11. mart/ožujak 2011

NALAS-a (Mreža asocijacija lokalnih vlasti jugoistočne Evrope, www.nalas.eu) u suorganizaciji Saveza općina i gradova Federacije BiH organizira Sajam općina i gradova jugoistočne Evrope.

Sajam će se održati u Sarajevu dvorana Zetra u periodu 10. – 11. mart/ožujak 2011. godine.

Na sajmu se očekuje učešće velikog broja delegacija jedinica lokalne samouprave iz 14 država članica NALAS-a ali i drugih gradova Evrope. Uz to veliki broj lokalnih i međunarodnih organizacija, potencijalnih investitora i poslovnih kompanija će biti predstavljeni na ovom sajmu. Ovaj događaj podržalo je i Predsjedništvo Skupštine Saveza općina i gradova Federacije BiH.

Elektronsku verziju brošure o Sajmu možete pogledati na www.nexpo.nalas.eu, a registraciju za učešće već sada možete popuniti na istoj web stranici.

Molimo Vas da izvijestite potencijalne izlagače sa područja vaše općine/grada o ovom događaju te planirate sredstva u budžetima za predstavljanje vaše općine/grada na ovom sajmu.



Poštovani članovi i čitaoci,

Kao i do sada, obavještavamo Vas o unutrašnjoj i vanjskoj komunikaciji i razmjeni najboljih iskustava i praksi kao i o različitim obukama koje mogu doprinijeti kadrovskom jačanju općinskih službenika.

Putem ovog biltena se možete informirati i o drugim dešavanjima u proteklom periodu kao što su konferencije, seminari, okrugli stolovi a koji mogu doprinijeti unapređenju sistema lokalne uprave.

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: dino@sogfbih.ba

Molimo vas da ovaj elektronski bilten prosljedite svim zainteresiranim u vašoj i susjednim općinama.

Ukoliko želite da objavite neke od vaših novosti, iskoristite elektronski bilten Saveza, koji je brz, efikasan i jeftin način komuniciranja sa javnošću.

Sa zadovoljstvom očekujemo vaše komentare, sugestije i primjedbe.

[Kontaktirajte nas](#)

[Telefoni:](#)

033/ 216 502, 033/ 552 812

[Fax:](#) **033/552 810, 033/ 552 811**

<http://www.sogfbih.ba>

NAJAVA ODRŽAVANJA TRINAESTE SJEDNICE PREDSJEDNIŠTVA SKUPŠTINE SAVEZA OPĆINA I GRADOVA FEDERACIJE BOSNE I HERCEGOVINE

Savez općina i gradova Federacije Bosne i Hercegovine, najavljuje da će se Trinaesta sjednica Predsjedništva Skupštine Saveza općina i gradova Federacije BiH održati u četvrtak, 24.02.2011. godine u BUGOJNU

Na sjednici članovi Predsjedništva će biti detaljno upoznati o aktivnostima Saveza na predstojećem Sajmu općina i gradova Jugoistočne Evrope koji će se održati 10. i 11. marta u Sarajevu. Za navedeni sajam do sada je prijavljeno oko 1000 učesnika iz 20-tak država. Ovo je jedinstvena prilika za predstavljanje lokalnih zajednica iz 12 zemalja članica NALAS-a (Mreža lokalnih i regionalnih vlasti Jugoistočne Evrope) i šire.

Na sajmu je, između ostaloga predviđeno potpisivanje Sporazuma o saradnji između Saveza općina i gradova Federacije BiH i Nacionalne asocijacije talijanskih općina (ANCI).

Predsjedništvo će razmatrati inicijativu za izmjenu Zakona o zakupu poslovnih prostorija koju inicira Općina Stari Grad Sarajevo. Inicijativa ide u smjeru davanja većih prava zakupodavcu u smislu raspolaganja svojim vlasništvom u slučaju da zakupoprimalac neredovno isplaćuje svoje obaveze.

Također, bit će razmatrana i inicijativa Općine Ilidža za dopunom Zakona o vodama i izmjenu Zakona o zaštiti i spašavanju ljudi i materijalnih dobara od prirodnih i drugih nesreća. Zakonom o vodama se uređuje način upravljanja vodama unutar teritorije Federacije BiH, koji obuhvata zaštitu voda, korištenje voda, zaštitu od štetnog djelovanja voda i uređenje vodotoka i drugih voda kao i ostalu problematiku vezanu za vode u Federaciji. Inicijativa ide u pravcu da se prihodi od vodne naknade koji pripadaju kantonima prioritetno koriste za uređenje i regulaciju vodotoka i zaštitu od poplava u općinama ugroženih od pojave poplava. Izmjenom Zakona o zaštiti i spašavanju ljudi i materijalnih dobara od prirodnih i drugih nesreća traži se da se povećaju sredstva potrebna za finansiranje preventivnih mjera zaštite i spašavanja sa 20% na 40%. Sadašnjim odredbama tog zakona općine su dovedene u situaciju da imaju značajna sredstva u budžetima koja se ne mogu utrošiti za namjene koje su najpotrebnije a to su uređenje i regulacija vodotoka kao jedna od najprioritetnijih preventivnih mjera zaštite i spašavanja za općine koje su ugrožene poplavama.

Predsjedništvo će se izjasniti i o inicijativi Općine Velika Kladuša o problemu privatizacije preduzeća «Agrokomerc», te će se informisati o pripremama za organiziranje radionica o stanju upotrebe informacionih tehnologija i implementacije elektronske uprave u jedinicama lokalne samouprave FBiH koju Savez realizira u saradnji sa Sarajevskom školom za nauku i tehnologiju (SSST).

Biće govora još o nizu drugih aktivnosti, događaja i susreta koje organizira Savez a tiču se naših članica, kao što su: izbor regionalnih lokaliteta za edukaciju uposlenika i izabranih predstavnika na lokalnom nivou, o predstojećim radionicama o uvođenju trezprskog poslovanja u jedinicama lokalne samouprave i sl.

Predsjedništvo će raspravljati i o nizu drugih pitanja koja su značajna i aktuelna za rad jedinica lokalne samouprave u Federaciji BiH.

<http://www.partnerstvogradova.ba/>

<http://www.nexpo.nalas.eu>

e-mail: dino@sogfbih.ba

NAŠ CILJ je informirati vas o seminarima, treninzima, konferencijama i drugim aktivnostima, koji unapređuju lokalnu upravu i kadrovsko jačanje zaposlenih u vašim općinama.

KORISNI LINKOVI ZA PREDPRISTUPNE FONDOVE:

<http://www.southeast-europe.net/en/>

<http://www.adriaticipacbc.org/>

<http://www.interregadriatico.it/index1.html>

<http://www.europa.ba/>

<http://www.cbib-eu.org/en/welcome/index.html>

<http://www.cbc.bih-mne.org/>

<http://www.srb-bih.org/>

<http://www.cbc-cro-bih.net/>

<http://www.programmemed.eu/>

<http://www.tacso.org/>

<http://www.euroinfocentar.ba/>

<http://www.balkanfund.org/>

<http://eurelmed.com/>

http://eacea.ec.europa.eu/index_en.php

Trinaesta sjednica Predsjedništva Skupštine Saveza općina i gradova Federacije BiH će se održati 24.02.2011. godine (četvrtak) u 11:00 sati u BUGOJNU, Hotel Rostovo.

PROJEKAT "NA GRANICI CARSTVA" U OKVIRU IPA PROGRAMA



BOSANSKI PETROVAC, 11. februar/veljača – Općina Bosanski Petrovac pristupit će projektu "Na granici carstva" kao jedan od partnera, u saradnji sa Sisačko-moslavačkom županijom. Riječ je o IPA Programu prekogranične saradnje Hrvatske i Bosne i Hercegovine. U konzorciju sa BiH strane, vodeći partner u

projektu je općina Ključ, a pored nje učestvovala i općine Tešanj, Bužim, te Vlada Unsko-sanskog kantona. Cilj projekta jeste objedinjavanje zajedničke turističke ponude općina, te povećanje turističke ponuda u pograničnom području, a time i nivo znanja i svijesti o istorijskom naslijeđu lokalnog stanovništva.

Ovaj vid saradnje, predstavlja jedan od oblika kulturnog razvitka općine, a cilj pristupanja projektu jeste uvrštavanje na turističku kartu Starog grada Bjelaja i srednjovjekovne crkve i nekropole sa stećcima na lokalitetu Crkvina u Koluniću.

Arheološka nalazišta u Bjelaju i Koluniću, 2007.godine, proglašena su nacionalnim spomenicima Bosne i Hercegovine.

ODRŽANA DVODNEVNA KONFERENCIJA O TEMI "JAČANJE LOKALNE SAMOUPRAVE U BIH"

ZENICA, 11. februar/veljača – U Zenici je 9. i 10. februara/veljače održana dvodnevna konferencija o temi "Jačanje kapaciteta lokalne samouprave u upravljanju razvojem". Na konferenciji su učestvovali predstavnici 12 općina iz BiH, partnera projekta "Jačanje lokalne samouprave u BiH" (SLS).

Općine partneri u ovom projektu su: Gornji Vakuf - Uskoplje, Ilijaš, Kostajnica, Kozarska Dubica, Ljubuški, Maglaj, Modriča, Orašje, Teslić, Vareš, Višegrad i Žepče.

SLS projekat realizuje Vlada Savezne Republike Njemačke, kroz njemačku razvojnu organizaciju GIZ (Deutsche Gesellschaft für Internationale Zusammenarbeit).

U uslovima izrazitih ekonomskih i socijalnih pritisaka u BiH i zemljama okruženja, općinska uloga u upravljanju razvojem na nivou lokalnih zajednica još više dobija na značaju.

Konferencija je imala za cilj zajedničko sagledavanje prepreka sa kojima se suočavaju lokalne samouprave pri implementaciji lokalnih razvojnih strategija.

Na konferenciji je razgovarano o povezivanju lokalnih razvojnih dokumenata sa prostornim planiranjem, te višegodišnjim budžetiranjem, putem aktivnog učešća i uz pristup koji poštuje ravnopravnost spolova, kao i uz promociju međuopćinske saradnje.

giz

Ishod konferencije predstavlja početak implementacije SLS projekta u partnerskim općinama i podršku što kvalitetnijem prilagođavanju projektnih aktivnosti stvarnim potrebama lokalnih samouprava.

Projekat SLS realizira se na osnovu Sporazuma o saradnji između Vlade Njemačke i Vijeća ministara BiH, a domaći partneri u realizaciji projekta su Ministarstvo uprave i lokalne samouprave Republike Srpske (RS), Ministarstvo pravde Federacije BiH, Savez općina i gradova Federacije BiH i Savez opština i gradova RS.

Projekat će se provoditi uz konsultacije i blisku saradnju sa drugim institucijama i organizacijama koje djeluju u oblasti lokalne samouprave u BiH.

GIZ je njemačka vladina organizacija koja podržava održivi razvoj kroz različite aktivnosti širom svijeta.

Najveći broj projekata GIZ provodi po nalogu Saveznog ministarstva za ekonomsku saradnju i razvoj Njemačke.

NEUPITNA SARADNJA OPĆINE I UNDP-a



BIHAĆ, 10. februar/veljača – Uspješna dosadašnja saradnja između Općine Bihać i UNDP-a u BiH, u svakom pogledu je neupitna, te u predstojećem periodu ona može samo jačati na partnerskim osnovama i dobrim projektima.

Ovo je zajednički zaključak svih učesnika današnjeg sastanka kojim je predsjedavao općinski načelnik mr. sci. Albin Muslić, a u kojem su učestvovali dr. Hamdija Lipovača, premijer USK, te Slobodan Tadić, program menadžer UNDP sa svojim saradnicima.

U dosadašnjem periodu UNDP je prema riječima Tadića, zajedno s Općinom Bihać, realizirao sve što je usaglašeno, tako da nema nikakvih smetnji da se dobra praksa nastavi na obostrano zadovoljstvo.

Svoju namjeru UNDP će dodatno osnažiti otvaranjem kancelarije u Bihaću za ovo područje Bosne i Hercegovine.

Prema riječima načelnika Muslića, dosadašnja iskustva Općine Bihać u kooperaciji s agencijom UNDP pohvalni su u svakom pogledu, a posebno kada su u pitanju infrastrukturna ulaganja.

Kako je kazao Muslić, Općina Bihać je i dalje na stajalištu strateškog udruživanja sredstava, kako bi se unaprijedila slika grada Bihaća, kako u pitanju kulture, infrastrukture, sporta, tako i u pogledu obezbjeđenja boljih uslova života za

povratnike i općenito održivi povratak.

Govoreći o planovima i programima Kantona, premijer Vlade USK dr. Lipovača, podsjetio je na izuzetno složeno stanje na ovom području, ogromne potrebe, te očekivanja kada je u pitanju partnerstvo s općinama, agencijama UN-a i programima koji bi se trebali implementirati u predstojećem vremenu u interesu građana USK.

Na kraju sastanka dogovoreno je da se već početkom mjeseca marta ove godine svečano otvori kancelarija UNDP-a, a s tim i konkretno počne novi krug strateškog partnerstva u nekoliko veoma značajnih oblasti.

PREDSTAVLJEN MDG-F PROGRAM OČUVANJA OKOLIŠA I KLIMATSKE PROMJENE



BIHAĆ, 10. februar/veljača – U okviru programa Očuvanje okoliša i klimatske promjene koji zajednički sprovodi pet UN agencija, predstavnici konsultantske kompanije „enova“, održali su u Općini Bihać prezentaciju o izradi lokalnog okolišnog akcionog plana (LEAP) predstavnicima općinske radne grupe, s kojom će na ovom projektu raditi idućih devet mjeseci.

Shodno početku suradnje s Općinom Bihać, načelnik Općine Bihać Albin Muslić, istakao je, da pripada grupi ljudi, koji se trude unaprijediti kvalitet života i građana Bihaća.

LEAP će definisati trenutno stanje okoliša u Općini Bihać, viziju razvoja zaštite životne sredine i prioritetne projekte koje Općina sprovoditi u idućih pet godina. Program Očuvanje okoliša i klimatske promjene je trogodišnji program, koji zajednički sprovodi pet UN agencija: UNDP, UNV, UNEP, FAO i UNESCO, u partnerstvu s Ministarstvom za vanjsku trgovinu i ekonomske odnose BiH, Ministarstvom civilnih poslova BiH, Ministarstvom za prostorno uređenje, građevinarstvo i ekologiju RS, Ministarstvom poljoprivrede, šumarstva i vodoprivrede RS, Ministarstvom okoliša i turizma FBiH, Ministarstvom poljoprivrede, vodoprivrede i šumarstva FBiH, općinama, te organizacijama civilnog društva. Program se finansira sredstvima španskog Fonda za dostizanje milenijumskih razvojnih ciljeva (MDG-F).

AMBASADOR NJEMAČKE U POSJETI GORAŽDU

GORAŽDE, 10. februar/veljača – Općinu Goražde posjetio je ambasador Njemačke u BiH Nj.E. Joachim Schmidt zajedno sa visokom delegacijom ambasade Savezne Republike Njemačke u BiH. Povod posjete je bio obilazak područja u Istočnoj Bosni koja su pretrpjela štete u posljednjim poplavama krajem 2010. godine. Delegacija je zajedno sa načelnikom Općine Goražde mr. Muhamedom Ramovićem i saradnicima posjetila poplavljeno područje u naselju Pobarnik gdje se Ambasador susreo sa porodicom Fatime Gačanin čiji je dom u poplavama uništen, a kojoj je nedavno od strane njemačke humanitarne organizacije HELP isporučena donacija u

građevinskom materijalu.

Njemačka vlada posredstvom svoje ambasade u BiH obezbjedila je 85.581,00 eura pomoći kroz projekat "Humanitarna pomoć za žrtve poplava u Istočnoj Bosni", koji implementira njemačka nevladina organizacija HELP Hilfe zur Selbsthilfe čija je ukupna vrijednost 95.090,00 eura. Ovim projektom obezbijeđen je ogrijeva za 105 porodica u Višegradu, Goraždu i Foča-Ustikolini, 20 kreveta i 16 ogrijevnih peći za porodice u Goraždu, hrana, higijenski paketi i setovi posuđa za 64 porodice evakuirane iz izbjegličkog naselja i smještene u prihvatni centar u Novom Goraždu.

Ovim projektom također 35 porodica i to 20 u Goraždu, 12 u Novom Goraždu i 3 u Foči, je dobilo građevinski materijal neophodan za rekonstrukciju svojih domova kako bi ponovno bili uslovni za življenje. Prilikom današnjeg susreta načelnik Ramović i ambasador Schmidth također su osim o poplavama razgovarali i o Danima privrede koji će se održati krajem marta u Goraždu, a koju je inicirala Njemačka ambasada u cilju povezivanja i uspostavljanja saradnje između goraždanskih i njemačkih privrednika. Načelnik Ramović još jednom se zahvalio Saveznoj Republici Njemačkoj, Ambasadoru Joachim Schmittu i predstavnicima HELP-a na dosadašnjoj saradnji kao i pruženoj pomoći ugroženom stanovništvu Goražda, naglasivši da je putem HELP-a stigla velika pomoć za Goražde. Delegacija je osim Goražda posjetila izbjeglička naselja u Novom Goraždu, Foča-Ustikolini i Foči.



USPOSTAVLJENA SARADNJA SAVEZA SA NACIONALNOM ASOCIJACIJOM TALIJANSKIH OPĆINA - ANCI



ANCI je Nacionalna asocijacija talijanskih općina, a koja predstavlja svoje članice pred državnim i evropskim institucijama i čiji je osnovni cilj razvoj uloge općina na svim poljima i sektorima važnim za lokalnu samoupravu. ANCI je već duže vrijeme uključena u procese decentralizacije i izgradnje mreža među asocijacijama lokalnih vlasti u zemljama Evropske unije, kao i na području Balkana.

U okviru svojih aktivnosti, ANCI je uključen u „SEENET Program – trans-lokalnu mrežu za kooperaciju između Italije i Jugoistočne Evrope“. SEENET Program ima za cilj pružanje podrške jedinicama lokalne samouprave u Jugoistočnoj Evropi kod pristupanja fondovima Evropske unije i

drugim domaćim i međunarodnim fondovima, te pružanje podrške pri izradi razvojnih ciljeva i inovativnih usluga kroz promociju kulturnog turizma, zaštite okoliša, te podrške malim i srednjim preduzećima.

ANCI će u okviru Sajma općina i gradova Jugoistočne Evrope «NEXPO 2011» organizovati radionicu „Održivi turizam“ na kojoj će brojne talijanske regije i općine, kao i općine i regije iz regiona prezentirati svoje dobre prakse. Radionica je planirana za drugi dan održavanja sajma 11. marta/ožujka 2011. godine od 11 do 14h.

U okviru «SEENET Programa», ANCI će podržati rad NALASA – Mreže asocijacija i lokalnih vlasti Jugoistočne Evrope kroz osnivanje i praćenje Radne grupe „Održivi turizam“. Svečano potpisivanje sporazuma između NALAS-a i ANCI-ja planirano je na Sajmu «NEXPO 2011».

Savezu općina i gradova Federacije BiH ukazano je zadovoljstvo da bude domaćin NALAS - Radne grupe „Održivi turizam“. U okviru održavanja Sajma «NEXPO 2011» planirano je potpisivanje bilateralnog Sporazuma o saradnji između Saveza općina i gradova Federacije BiH i ANCI-ja kojim će se urediti rad i sjedište navedene radne grupe.

OPĆINA NOVI GRAD SARAJEVO TOKOM 2010. PRUŽILA 520.784 USLUGA GRAĐANIMA



SARAJEVO, 9. februar/veljača –

U evidenciji Službe za opću upravu Općine Novi Grad Sarajevo zabilježeno je da je tokom 2010. godine pruženo 520.784 usluga građanima, a 150.000 građana je koristilo usluge općinske administracije.

U matične knjige uvedeno je 4.164 upisa i dopuna, dok je na području općine sklopljeno 722 braka. Izvršen je upis u matične knjige za 747 preminulih

građana, 328 upisa državljana u matičnu knjigu rođenih, te 26 upisa u entitetske knjige državljana.

Uposlenici Matičnog ureda izdali su 26.992 izvoda iz matičnih knjiga i 1.763 uvjerenja po različitim osnovima.

Izvršeno je 472.846 ovjere prepisa i legalizacija potpisa u šalter sali i još 451 ovjera na terenu. Na protokolu matičnog ureda primljeno je 4.980 predmeta. Otpremljeno je 37.651 pismena pošta, te izvršene 6.168 elektronske provjere podataka u matičnim knjigama rođenih i knjigama državljana vezana za izdavanje biometrijskih putnih isprava.

UVOĐENJE SISTEMA ENERGETSKE EFIKASNOSTI U OPĆINI GRAČANICA

GRAČANICA, 09. februar/veljača – U kabinetu Općinskog načelnika obavljen je radni dogovor sa projekt koordinadorima Udruženja za razvoj i podršku (CRP) Ervinom Đemberom i Almom Tihić, te projekt menadžerom Centra za životnu sredinu iz Banja Luke Viktorom Bijelićem oko implementacije projekta „Štedi energiju – sačuvaj klimu i novac“, koji finansira Delegacija Evropske unije u Bosni i

Hercegovini i Evropski instrument za demokratizaciju i ljudska prava – EIDHR.

Riječ je o jednom od prvih ozbiljnijih dogovora oko izrade i realizacije sistema energetske efikasnosti u općini Gračanica. Predstavnici navedenih organizacija zvanično su prenijeli informaciju da je ova općina jedna od pet općina u Bosne i Hercegovini, koju je Delegacija



Evropske unije, u saradnji sa navedenim organizacijama, odabrala da radi na uvođenju sistema energetske efikasnosti. Općina Gračanica, kako je rečeno, već je poznata u širem okruženju po svom zalaganju za uvođenje i korištenje inovativnih pristupa pri rješavanju problema energetske efikasnosti na svom području, pri čemu ključno mjesto ima projekat toplifikacije grada, kao najbolji ekološki projekat na obnovljivu energiju u Bosni i Hercegovini, koji se uspješno realizuje, tu su i počeci korištenja solarne energije, prvi efekti na uštedama električne energije u javnoj rasvjeti, jačanje ekološke svijesti i svijesti o potrebi štednje energije, utopljanja objekata itd.

Prihvatanjem ovog programa, općina Gračanica će biti među prvim općinama u BiH, koje efikasno koriste energiju i obnovljive izvore energije. Dosadašnji rezultati i rad općine u oblasti energetske efikasnosti bit će prepoznat kod međunarodnih donatora. Tako će se ostvariti pristup za korištenje EU fondova iz oblasti energetskog programa i projekta zaštite okoliša, korištenja obnovljivih izvora energije i poboljšanja energetske efikasnosti. Općina će ostvariti mogućnost uključenja u mrežu energetski efikasnih gradova Evrope i ostvariti uštede smanjenjem javne potrošnje. S jedne strane ostvarit će se velike finansijske uštede, a s druge, građani će naučiti da energetski efikasno koriste energiju i time ostvare uštede i smanjenje zagađenja okoliša. To je jedan od ključnih strateških ciljeva, koji se ističe u novoj razvojnoj strategiji općine za narednih nekoliko godina.

Na ovom sastanku obavljeni su i konkretni dogovori u pogledu obaveza općine i navedenih organizacija u implementaciji ovog značajnog projekta.

ZAJEDNIČKIM SNAGAMA OŽIVJETI TURIZAM U DOLINI VRBASA



BUGOJNO, 08. februar/veljača – Općina Bugojno zajedno sa općinama Donji Vakuf, Gornji Vakuf-Uskoplje, Turističkom zajednicom Kantona Središnja Bosna i Kantonalnim zavodom za urbanizam, prostorno planiranje i zaštitu kulturno - historijsko nasljeđe implementira projekt finansiran od strane Evropske unije pod nazivom "Vrbas, Udruženi turistički razvoj doline Vrbasa".

Projekt je vrijedan 320.112 eura i ima za cilj uspostavljanje zajedničkog turističkog područja vrbaske doline, pripremu turističkih proizvoda sa ciljem privlačenja novih turista u područje i ohrabrivanje duljeg ostanka trenutnih posjetitelja kao i

identifikaciju i promociju povijesnih, kulturnih i prirodnih vrijednosti područja, te pripremu zajedničke strategije daljeg razvoja turističkog sektora.

U proteklom periodu implementacije projekta uz angažman svih sudionika završena je analiza trenutnog turističkog stanja, pripremljen plan razvoja novih turističkih proizvoda, digitalizirano najvrednije prirodno i kulturno-historijsko naslijeđe, okončane su obuke za turističke vodiče i aktere ruralnog razvoja, pripremljena je poslovna i marketing strategija daljeg razvoja turizma, kreiran vizuelni identitet i razvijen web portal.

Trenutno su u toku aktivnosti na postavljanju pozdravnih i informativnih tabli, te kako kažu u Općini Bugojno, u pripremi su aktivnosti na izgradnji odmarališta kako bi projekt dobio svoj okvir.

U cilju što kvalitetnijeg predstavljanja svih potencijala i mogućnosti i turističke promocije područja općina Bugojno, Donji Vakuf i Gornji Vakuf – Uskoplje raspisan je javni poziv svim zainteresovanim za oglašavanje putem web portala razvijenog u okviru Projekta "VRBAS, Udruženi turistički razvoj doline Vrbasa".

Poziv se odnosi na sva zainteresovana javna preduzeća, ustanove, privredne subjekte, posebno subjekte koje se bave turizmom ili srodnim djelatnostima (smještaj, ugostiteljstvo, prevoz), finansijske institucije, vjerske zajednice, sportska, kulturna, planinarska, lovna, ribolovna društva i sva druga udruženja građana, te sve građane općina Bugojno, Donji Vakuf i Gornji Vakuf – Uskoplje koji pružaju usluge smještaja, prevoza i sl.

ODRŽANA SJEDNICA KOMISIJE ZA USTAVNA I ZAKONODAVNA PITANJA I KOMISIJE ZA IMOVINSKA PITANJA ...

SARAJEVO, 07. februar/veljača – U četvrtak 3. februara/veljače u prostorijama Saveza općina i gradova Federacije BiH u Sarajevu, održana je Peta sjednica **Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša**, a 07. februara/veljače Sedma sjednica **Komisije za ustavna i zakonodavna pitanja Skupštine Saveza**.

Na obadvije sjednice razmatrani su isti dokumenti i to: **Inicijativa Općine Stari Grad Sarajevo za izmjenom i dopunom Zakona o zakupu poslovnih prostora Kantona Sarajevo**, te dvije inicijative Općine Ilidža – **Inicijativa za izmjenom i dopunu Zakona o vodama FBiH i izmjenom i dopunu Zakona o zaštiti i spašavanju ljudi i materijalnih dobara od prirodnih i drugih nesreća FBiH**.

Inicijativa za izmjenom i dopunom Zakona o zakupu poslovnih prostorija odnosi na izmjene i dopune kojima bi se na adekvatniji način regulisala oblast otkaza ugovora o zakupu poslovnih zgrada i prostorija u odnosu na dosadašnji postupak čija je osnovna odlika neefikasnost i dugotrajnost, što ide u prilog zakupcima koji se ponašaju suprotno preuzetim obavezama. U diskusiji, u kojoj su učestvovali svi prisutni, istaknuto je da ovaj problem postoji u svim jedinicama lokalne samouprave koje raspolažu poslovnim prostorima. Zaključeno je da se inicijativa vrati predlagачu na detaljniju razradu, nakon čega će ići na Predsjedništvo, te da se provede anketa u svim ostalim kantonima u FBiH kako bi se snimilo stanje u ovoj oblasti i utvrdila potreba mijenjanja Federalnog Zakona o zakupu poslovnih zgrada i prostorija.

Inicijativa Općine Ilidža za dopunom Zakona o vodama ide u pravcu da se prihvati od vodne naknade koji pripadaju kantonima prioritarno koriste za uređenje i regulaciju vodotoka i zaštitu od poplava u općinama ugroženih od pojave poplava. Komisija je prihvatila navedenu inicijativu i predložiti će Predsjedništvu Saveza da

se proslijedi nadležnim institucijama, te je zaključila da je potrebno da se pri donošenju petogodišnjih planova upravljanja vodama u kantonima obavezno konsultuju jedinice lokalne samouprave.

Izmjenom Zakona o zaštiti i spašavanju ljudi i materijalnih dobara od prirodnih i drugih nesreća, koju inicira Općina Ilidža traži se izmjena Člana 180. stav 4. u smislu da se povećaju sredstva potrebna za finansiranje preventivnih mjera zaštite i spašavanja sa 20% na 40%. Sadašnjim odredbama tog zakona općine su dovedene u situaciju da imaju značajna sredstva u budžetima koja se ne mogu utrošiti za namjene koje su najpotrebnije a to su uređenje i regulacija vodotoka kao jedna od najprioritetnijih preventivnih mjera zaštite i spašavanja za općine koje su ugrožene poplavama. Nakon diskusije zaključeno je da se prihvati inicijativa i predlaže se Predsjedništvu Saveza da istu proslijedi nadležnim institucijama.

Komisija je razmatrala i **Prijedlog zakona o zaštiti od požara i vatrogastvu Tuzlanskog kantona** na koji su samo Općine Lukavac i Tuzla imale bitnih primjedbi koje su iznesene u javnoj raspravi o Nacrtu ovog zakona, ali koje nisu uvažene. Zaključeno je da se preporuči Kantonalnoj upravi civilne zaštite Tuzlanskog kantona da pri donošenju ovog zakona uvrsti primjedbe i prijedloge općina Lukavac i Tuzla. Gđa Zlata Turkić je upoznala prisutne članove Komisije da je u Savez općina i gradova FBiH dostavljen **Nacrt Zakona o vinu** kojeg smo proslijedili svim članicama Saveza na mišljenje i primjedbe. Naročito je traženo od jedinica lokalnih zajednica koja se bave ovom djelatnošću da se aktivno uključe u razmatranje ovog prednacrt zakona, kao i u Javnu raspravu koja će se održati 15.02.2011. godine.

POTPISAN UGOVOR ZA REALIZACIJU PROJEKTA OTPADNIH I OBORINSKIH VODA NA PODRUČJU OPĆINE BIHAĆ

BIHAĆ, 8. februar/veljača – U Bihaću je danas potpisan ugovor između Općine Bihać, Konzorcija "Fichtner" GmbH iz Štutgarta i bihaćkog Una-Consultinga za implementaciju Projekta otpadnih i oborinskih voda na području općine Bihać. Ovim je završena procedura oko izbora konsultanta za implementaciju Projekta odvodnje i prečišćavanja otpadnih i oborinskih voda na području ove općine.



U prisustvu brojnih gostiju i predstavnika javnog i političkog života Bihaća, svoje potpise u ime ugovornih strana stavili su općinski načelnik Albin Muslić i direktor za razvoj poslova i akvizije pri njemačkoj firmi Fichtner Dewi Evans.

Ovim su osigurani uslovi za realizaciju projekta vrijednog 17,5 miliona eura, te za povlačenje prvih sredstava iz KfW granta u iznosu od 1,3 miliona eura za izradu potrebne dokumentacije, čime praktično počinje njegova realizacija.

Načelnik Muslić je istakao kako je ovo historijski trenutak za Bihać jer će se ne samo riješiti ovaj problem, već i zaposliti građevinsku operativu, a svako radno mjesto u ovoj situaciji je veliko. Da se radi o velikom projektu potvrdili su i Dewi Evans, odnosno Sandi Zulić koji su kazali kako je ovo prvi njihov veliki projekat u BiH. Prema njihovim riječima, projekat čiji se koraci danas trasiraju, jeste od obostranog interesa, kako za njih, tako i za Općinu Bihać, te izražavaju optimizam u pogledu njegovog početka, razvoja i četvorogodišnje suradnje.

KONFERENCIJA O LOKALNOM EKONOMSKOM RAZVOJU U BIH

ZENICA, 17. februar/veljača – U Zenici je danas održana Konferencija o lokalnom ekonomskom razvoju u BiH i okupila je predstavnike 30 lokalnih razvojnih agencija iz cijele zemlje, javio je dopisnik Agencije ONASA.



Konferencija je realizovana u okviru projekta "EU podrška institucionalnom jačanju kapaciteta regionalnog i lokalnog ekonomskog razvoja i razvoja malog i srednjeg poduzetništva" (EURELSMED) koji finansira Evropska unija.

Na Konferenciji su se razmatrale mogućnosti unapređenja lokalnog ekonomskog razvoja u BiH, te načini kako lokalne razvojne agencije mogu doprinijeti ovom procesu.

Učesnici u radu Konferencije stekli su uvid u načine na koje EURELSMED može pružiti podršku jačanju kapaciteta u oblastima upravljanja projektima u općinama i doprinijeti boljoj efikasnosti lokalnog ekonomskog razvoja.


Projekat EURELSMED će obuhvatiti programom obuke i razvojne agencije koje djeluju na lokalnom nivou, radi jačanja kapaciteta u oblastima upravljanja projektima namijenjenih općinama i drugim lokalnim organizacijama.

Ovaj trogodišnji projekt, za koji je Evropska unija osigurala 2,4 miliona eura, realizuje se od septembra 2009. godine, a nudi široki spektar podrške, savjetovanja i obuke za regionalne i lokalne razvojne agencije širom BiH.

OPĆINA TRAVNIK STVARA PREDUSLOVE ZA RAZVOJ TURIZMA NA VLAŠIĆU

TRAVNIK, 04. februar/veljača – Općina Travnik krenula je u početne aktivnosti na realizaciji ambicioznog projekta izgradnje prečištača otpadnih voda na Vlašiću.

Iako već postoji projektna dokumentacija za izgradnju ovog prečištača na Vlašiću prema riječima Amre Đelibašić, pomoćnice načelnika za razvoj i gospodarstvo Općine Travnik, ona je stara oko 20-tak godina i



bit će potrebno uraditi njenu reviziju. Za tu aktivnost u novom nacrtu proračuna za ovu godinu predviđena su sredstva od 15.000 KM.

Nakon revizije bit će spremna dokumentaciju koja će biti osnova za dalje aktivnosti na realizaciji projekta. Naime, s njom planiraju aplicirati za sredstva iz evropskih fondova kako bi osigurali dalju realizaciju ovog projekta.

Nakon što se usvoji budžet Općine ići će sa raspisivanjem javnog poziva za izbor konzultantske kuće koja će raditi reviziju projektne dokumentacije. Nakon toga

idu aplikacije prema fondovima za osiguranje sredstava kojima bi mogli krenuti u realizaciju tog projekta.

Realizacijom ovog projekta, pretpostavlja se da će se stvoriti dobar poticaj razvoju turizma na Vlašiću koje je jedan od glavnih turističkih aduta općine Travnik. Osim toga Babanovac na Vlašiću je turistička destinacija na koju, kaže Delibašić, polažu velike nade u idućem razdoblju i koja bi trebala pokrenuti razvoj ove općine. Zbog toga im je cilj da ekološki uredi ovu sredinu što je i osnova za razvoj bilo koje vrste turizma.

POTPISAN UGOVOR O PARTNERSTVU IZMEĐU REZ-A I OPĆINE GORNJI VAKUF/USKOPLJE



ZENICA, 4. februar/veljača – Načelnik Općine Gornji Vakuf/Uskoplje Sead Čaušević i direktorica Regionalne razvojne agencije (REZ) za Centralnu BiH Amela Maličbegović potpisali su danas u Zenici Ugovor o partnerstvu.

Ugovorom će Agencija REZ pružiti tehničku podršku Općini Gornji Vakuf Uskoplje u izradi glavnih izvedbenih projekata za infrastrukturno uređenje poslovne zone "Batuški lug", što je preduslov za izgradnju zone i dobijanje namjenskih podsticajnih sredstava.

Cilj uspostavljanja poslovne zone "Batuški lug" je poboljšanje poslovne infrastrukture i uslova za investiranje na ovom području, smatraju u Agenciji REZ.

Ova aktivnost realizuje se u sklopu tehničke podrške REZ-a općinama regije Centralna BiH, u okviru aktivnosti «Programa podrške izvozu i trgovini – SET», kojeg finansira Vlada Kraljevine Holandije.

Cilj joj je stvaranje povoljnije poslovne klime za privlačenje investitora i otvaranje novih radnih mjesta putem spajanje različitih oblasti djelovanja i povećanje konkurentnosti privatnog sektora za izvoz i trgovinu.

EMISIJA OBVEZNICA OPĆINE TEŠANJ PUTEM SASE

TEŠANJ, 04. februar/veljača – Općina Tešanj je prva općina u Federaciji BiH koja se odlučila za emisiju municipalnih obveznica javnom ponudom putem Sarajevske berze vrijednosnih papira (SASE).

Početkom godine Općina je potpisala ugovor sa agentom emisije - brokerskom



kućom SEE Investment Solutions iz Sarajeva, koja je zadužena za cjelokupnu tehničku realizaciju ove emisije vrednosnih papira.

Sredstva prikupljena na ovaj način bit će investirana za uređenje poslovne zone Glinište u Jelahu.

Vrijednost emisije je 500.000 KM. Prva emisija općinskih obveznica omogućena je Zakonom o izmjenama i dopunama Zakona o dugu, zaduživanju i garancijama u FBiH.

U Republici Srpskoj općine su u ovaj proces krenule još 2008. godine kada su Banja Luka i Laktaši završili proces emisije obveznica u ukupnoj vrijednosti od 17 milijuna KM, dok je iznos emitiranih općinskih obveznica u 2009. iznosio 18,28 milijuna KM. Tokom prošle godine još sedam općina u RS-u je emitiralo 18 milijuna KM obveznica.

POTPISIVANJE SPORAZUMA NAČELNIKA O ENERGETSKOJ EFIKASNOSTI / NEXPO - 2011



Inicijativa za usaglašavanje i donošenje „Sporazuma načelnika“ (COVENANT OF MAYORS) pokrenuta je od strane Europske komisije, Directorate-General for Energy and Transport, 29. januara 2008. godine kao prioritarna akcija prema smjernicama za poboljšanje mjera energetske efikasnosti EU (Action Plan for Energy Efficiency). Ova akcija na evropskom nivou

uključuje gradove i regije u realizaciju zadanih ciljeva iz strategije održivog energetskog razvoja.

„Sporazum načelnika“ podrazumijeva ostvarenje ciljeva Europske unije do 2020. godine u reduciranju emisije CO₂ kroz sprovođenje aktivnosti iz „Sporazuma načelnika“, a koje se odnose na izradu i provedbu Akcionog plana za održivi energetski razvoj grada, podnošenje izvještaja o realizaciji Akcionog plana, organiziranje Energetskog dana u suradnji sa Europskom komisijom i drugim učesnicima, informisanje građana o mogućnostima i prednostima korištenja energije na efikasan način, redovnog informisanja lokalnih medija o razvoju Akcionog plana., prisustvovanje i doprinos na godišnjoj EU Konferenciji načelnika na temu „Sustainable Energy Europe“.

Do sada je „Sporazumu načelnika“ pristupilo 2.181 lokalnih vlasti širom Evrope, od čega pet iz Bosne i Hercegovine (Banja Luka, Bijeljina, Prijedor, Sarajevo i Tuzla).

U sklopu Sajma općina i gradova jugoistočne Evrope „Nexpo-2011“, koji će se održati 10-11. marta/ožujka 2011. godine u Sarajevu, biti će predstavljen Sporazum načelnika o energetskej efikasnosti.

Ukoliko vaša općina/grad želi da se pridruži ovoj inicijativi posjetite sljedeću web-stranicu

http://www.eumayors.eu/about_the_covenant/how_to_join_en.htm

SVJETSKA BANKA OBEĆALA SREDSTVA ZA POLJOPRIVREDNE PROJEKTE NA PODRUČJU OPĆINE GORAŽDE

GORAŽDE, 10. februar/veljača – Općinu Goražde posjetili su danas predstavnici Svjetske banke, tačnije Guy J. Alaerts program tim menadžer Svjetske Banke sa saradnicima. Oni su na sastanku sa načelnikom Općine



Goražde mr. Muhamed Ramovićem, a kome su prisustvovali i predstavnici ministarstva za privredu BPK-a, koje je i iniciralo ovaj susret, razgovarali o pomoći Svjetske banke u realizaciji poljoprivrednih projekata.



Naime, Svjetska Banka je do sada u više navrata pomagala razvoj poljoprivredne proizvodnje u Bosni i Hercegovini. Entitetske vlade trebaju dobiti značajna sredstva od ove banke a koja će potom biti raspoređena po lokalnim zajednicama. Značajna sredstva kako je rečeno, biće uloženo i na područje općine Goražde tačnije u sisteme navodnjavanja poljoprivrednih

dobara u šta će biti uloženo oko milion dolara. Pored sistema navodnjavanja Svjetska banka pomoći će i druge poljoprivredne projekte na ovom području.

OPĆINA BOSANSKI PETROVAC POMAŽE MZ «JANJA» U OPĆINI BIJELJINA

BOSANSKI PETROVAC, 08. februar/veljača – Da je Bosanski Petrovac općina koja više ne traži pomoć nego je nudi govori i činjenica da je danas upućen konvoj pomoći od pet šlepera za ugrožene u poplavljenom području Bijeljine, tačnije u MZ Janja.

Kako se je u kontaktu udruženja poljoprivrednika ove dvije općine saznalo da je najveći problem ishrana za stoku u toj, u poplavi stradaloj mjesnoj zajednici, općina

Bosanski Petrovac je pokrenula akciju prikupljanja baliranog sijena. Pohvalna je činjenica da su se građani Bosanskog Petrovca jako dobro odazvali pozivu i preko mjesnih zajednica prikupljeno je preko 2.000 bala sijena koje će danas biti prevezene u Janju. Na poziv načelnika Općine Bosanski Petrovac Ermina Hajdera, akciji se pridružio i Smail Toromanović, direktor Poljoprivrednog zavoda USK, koji je preko firme MS-Alem iz Bosanske Krupe obezbijedio jedan šleper za transport, te ŠPD Unsko-sanske šume šumarija Bosanski Petrovac koji su donirali kamion ogrijevnog drveta za područnu školu u Janji.

Ovoj akciji pridružili su se i iz Općine Drinić/Petrovac te će uputiti jedan šleper sijena i kamion hrane.



Najava obilježavanja Dana općina

08. februar/veljača - Dan Općine Odžak. Tog dana 1996. godine prvi povratnici predvođeni policijskim snagama vraćaju se u svoje domove.

20. februar/veljača - Dan Općine Bužim. Na taj dan 1995. godine Predsjedništvo RBiH je Uredbom sa zakonskom snagom formiralo općinu Bužim.

21. februar/veljača - Dan Općine Ljubuški. Tog dana 1444. godine napisan je testament bogatog dubrovačkog trgovca Gojslava Orlovića u kojem se spominje dar crkvi u Ljubuškom. Smatra se najstarijim pisanim dokumentom u kojem se spominje naziv Ljubuški (Lubusia), a čuva se u dubrovačkom arhivu.

22. februar/veljača - Dan Općine Jablanica i dan sjećanja na oslobođenje grada u Drugom svjetskom ratu.

23. februar/veljača - Dan Općine Velika Kladuša. Ovaj datum je značajan kao sjećanje na prvo oslobođanje Velike Kladuše u Drugom svjetskom ratu kada je uspjela opstati kao slobodan teritorij punih 731 dan.

26. februar/veljača - Dan Općine Bihać. Na taj dan 1260. zabilježen je prvi pisani historijski trag o gradu Bihaću u Povelji ugarsko-hrvatskog kralja Bele IV, kao gradu sagrađenom na Otoku sv. Ladislava, u vlasništvu benediktinske opatije iz Topuskog. Godine 1262. proglašen je slobodnim kraljevskim gradom sa svim pravima što mu je osiguralo samostalni razvoj.

29. februar/veljača - Dan Općine Ilijaš. Na ovaj dan, 1996. godine, na oslobođenu teritoriju općine Ilijaš došlo je do masovnog povratka izbjeglog stanovništva i uspostavljanja civilne vlasti.

